

## Cörta tli San Pöblo ca ujpa oquejcuelfe TIMOTEO

<sup>1</sup> Naja nePöblo. Necaca netlateotitlantle de Cristo Jesús ipampa Deus oquenejqe ma neye, hua ma netlanunutzta de que Deus queprometierojque quetiemasque nemelestle ca quiejquech cate tieca Cristo. <sup>2</sup> Temetzejcuelfe ini nönca cörta para taja, Timoteo, öque temetztlasojtla lalebes, quieme tlö tenoconie teyene. Deus toTajtzi, hua toTlöcatzintle Cristo Jesús ma metzmacacö tieinfavur hua tieintlöocolteles hua yulsiebestle.

### *Amo xepinöhua de xetlajtajto de toTlöcatzintle*

<sup>3</sup> Temetzelnömeque seme ipa notlajtlötlajteles ca yohuale hua ca tunale. Netietlasojcömatelelea Deus por taja. Pos naja netietequepanoa Deus quiename tietequepanojque notötajua, hua amo niechtieyelfe noyulo de niontle. <sup>4</sup> Cuöc notlajtlötlajtea por taja, nequelnömeque de quiene techucaya, hua necneque temetzejtas para nepajpöques. <sup>5</sup> Nequelnömeque de quiene melöhuac tomoneltoca. Pos ejqueu nuyejqe neneltocaloöya mosejtzi Loida hua monöntzi Eunice, hua öxö neca seguro de que taja nuyejqe ejqueu tomoneltoca. <sup>6</sup> Por inu temetztlanömechtea ini nönca: Xecöpröro inu beletelestle tli Deus metzmacaque cuöc nequentlöle nomöhua mopa. <sup>7</sup> Pos inu Espíritu tli Deus tiechmacaque amo tiechchihualtilo ma teyecö temabeneme, tlöcamo cache tiechmacalo checöhualestle hua tlasojtelestle, hua tiechpaliebilo para tecyecpensörusque.

<sup>8</sup> Por inu, amo xepinöhua de xetlajtajto de toTlöcatzintle, hua amo xepinöhua de que naja neca neprieso por tiepampa yejuatzi. Cache cuale xecsufriro taja nuyejqe

por inu quale tlamachestelestle ca inu checöhuallestle tli Deus quetiamacalo. <sup>9</sup> Yejuatzi tiechmöquextejque, hua tiechnutzque para ma tecbicacö quale tonemeles. Amo tiechmöquextejque por canajyetla quale tli tejua tecchijque, tlöcamo porque ejqueu oquenejque hua de inu manera tiechmacaque tiefavur por Cristo Jesús. Tiechmacaque inu tiefavur cachto de cuöc mochejchihuane tlöltecpactle, <sup>10</sup> pero quiemach öxö ye quale niese inu tiefavur porque ye hualiloac toTiemöquextejcötzi Cristo Jesús. Yejuatzi quexexetunque mequelestle, hua por medio de inu quale tlamachestelestle tiechmachestiluc quiene quale tecpeasque nemelestle, hua ejqueu ayec temejmequesque.

<sup>11</sup> Deus niechtitlanque para ma netlanunutzta de ini nönca quale tlamachestelestle. Hua niechtlölejque para ma neye netlateotitlantle hua netlamachestiöne. <sup>12</sup> Yaja por ini nönca necsufrirojteca noche ini nönca sösantle. Pero amo nepinöhua, ipampa naja netieixomate yejuatzi öque tieca noneltocac. Hua neca seguro que yejuatzi quale quemalfisque lo que tli naja netiemöctele hasta ipa inu sölültimo tunale.

<sup>13</sup> Taja xectoca inu quale tlajtulme tli naja otemetzejtete. Hua xeneme ca inu neltoquelestle hua tlasojtelestle tli tecpea tejua tieca Cristo Jesús. <sup>14</sup> Ca tiepaliebeles Espiritu Sönto öque nemoa tojttec, xecmalfe inu tlin quale tli Deus metzmöctejque.

<sup>15</sup> Ye tecmate que innochtie tli cate de ompa Asia oniechcajcöjque. Entre yejua cate Figelo hua Hermógenes. <sup>16</sup> Tlöcatzintle ma netlöocolticö de Onesíforo hua tli cate pa ichö, ipampa yaja oniechescaliöya, hua amo pinöhuaya de que naja netzactaya ipan cörsel. <sup>17</sup> Pos cuöc yaja oyeya necö Roma oniechtiemo hasta cöne oniechniexte. <sup>18</sup> Tlöcatzintle ma netlöocolticö de yaja

ipa inu sölúltimo tunale. Taja ye tecmate quiene lalebes otiechpaliebe ompa pa Efeso.

## 2

### *Xeye sente soltöro cuale de Cristo Jesús*

<sup>1</sup> Öxö, taja, noconie, xomocujpetzo por tiechecöhuales Cristo Jesús, tli yejuatzi tiechmacalo. <sup>2</sup> Hua inu sösantle tli otejcac, tli naja onequejto inmixtla meyactie testigos, inu sösantle xequenmöcte tlöca tli cate de confiönza, tli cuale quemachestisque ca ocseque tlöca.

<sup>3</sup> Xecsufriro quieme naja, hua ejqueu teyes tesoltöro cuale de Cristo Jesús. <sup>4</sup> Sente soltöro tlin cuale amo tlatzölö calaque ca negocios hua asuntos de innemeles de ocseque. Ejqueu quechihua ipampa queneque que öque quetlöle quieme soltöro ma quecualajta lo que tli quechihua. <sup>5</sup> Ejqueu nuyejque öque majöbeltea, tlö amo möbeltis quiene quemarcöroa reglamento, abele queselis trofeo. <sup>6</sup> Hua öque tequete ipa cömpo, conbenierebe yaja ma cachtö que sele ipörte de tli omochi. <sup>7</sup> Xecyecpensöro de lo que tli nequejtojteca, hua Tlöcatzintle metzchibelisque ma xecasojcömate noche inu sösantle.

<sup>8</sup> Xequelnömehta de Jesucristo, öque oyulebihuac de intzölö mimejque, hua nehuöxcatiluc de inu reino de tietöta David, ejqueu quiene quejtoa inu cuale tlamachestlestle tli naja netlanunutza. <sup>9</sup> Naja necsufrirojteca meyac sösantle ipampa netlanunutza de inu cuale tlamachestlestle. Hasta necarienailpeteca quieme tlö neyene netlachtejque noso netlamectiöne. Pero tietlajtultzi Deus amo ilpeteca. <sup>10</sup> Por inu necxicoa noche ini sösantle, por impampa niecate tli Deus quemixpejpenque. Pos necneque que yejua ma quepeacö nemöquextelestle tieca Cristo Jesús, hua tlanixtelestle tli ayec tlames. <sup>11</sup> Nöncate tlajtulte cate de confiönza:

Pues tlö ye otemejmejqe tieca Cristo, nuyejque tenemesque tieca.

<sup>12</sup> Tlö tecxicusque, tetlamandörusque tieca yejuatzi.

Tlö tequejtusque que amo tetieixomate, yejuatzi nuyejque quejtusque que amo tiechixomatihua.

<sup>13</sup> Mös cana tejua amo tejcumplirusque totlajtul, pero yejuatzi seme quecumplirusque tietlajtul; pos yejuatzi abele iloas ocsie de lo que iloac.

*Xeye sente yectequetiöne*

<sup>14</sup> Xequentlalnömete noche creyentes de nönca sösan-tle, hua xequentlajtulmaca tieixpa Deus ma quecöhuacö de tladiscutirojtasque palöbras, porque inu amo quepea proviecho. Solamiente tlaperjudicöroa ca niecate tli quecaque. <sup>15</sup> Taja xecöpröro para que Deus quecualjetasque motlachihual. Ejqueu teyes teyectequetiöne, que amo tecpeas niontle de tli tepinöhuas, hua teyectequetes ca tietlajtultzi Deus tli melöhuac. <sup>16</sup> Pero xomoxelo de inu tlajtulme tli giente tlanunutza, tli amo quepea proviecho. Pos tli tlanunutza de inu, mocajcalactea cache hua cache ipa tlajtlacule. <sup>17</sup> Hua intlajtulhua mosoa quieme söhuame. Ejqueu oquenpasöro Himeneo hua Fileto, <sup>18</sup> tli ye omoxelöjque de lo que tli melöhuac. Pos quejejtoa que ye opanuc inu yulebelestle de mimejqe, hua quentlapolultelea inneltoqueles de seque. <sup>19</sup> Pero Deus ye tiechonelfejque quiene ca tenemesque, hua lo que tli tiechelfejque icaca quiename sente cimientö tli ayec mocuenis, tli ipa quepea sente sieñas tli quejtoa: Tlöcatzintle quemixomatihua tli tiehuöxcagua, hua:

Innoctie tli quebica tienumbre Tlöcatzintle ma moxelucö de tlajtlacule.

<sup>20</sup> Ipa sente chöntle bieye amo solamiente oncate tröstes de oro hua de plöta, tlöcamo nuyejque de cuabetl

hua de tapalcatl. Seque cualtzetzi cate para mousörusque cuöc tlalfequisa, o noso cuöc onca visitas. Hua ocseque cate tli mousöroa cöra tunale. <sup>21</sup> Tlö canajyeca moxelus de noche sösantle tli amo cuale, iyes quieme sente tröste de inu cualtzetzi. Iyes yectec, iyes cuale para cuale cusörusque toTiecojtzi, hua iyes listo para quechihuas noche tlin cuale.

<sup>22</sup> Taja noso xecholo de inu sösantle tli queliebea inacayo de öque oc icaca pelalactle. Xectoca yectelestle, neltoquelestle, tlasojtelestle, hua siebelestle inca innochtie tli tietzajtzelea Tlöcatzintle ca noche sentetl inyulo. <sup>23</sup> Pero amo xecchibele cöso de inu preguntas tli sa tuntos, tli tlajtlane inu giente tli sa tlajtlajtojtene. Ye tecmate que inu sösantle sa quebicatz peleitos. <sup>24</sup> Hua öque tlatequepanoa para Tlöcatzintle amo conbenierebe ma neme ipa peleitos. Cache conbenierebe ma iye cuale tlöcatl ca innochtie, ma cuale quemate tlamachtis, hua ma quemate quexicus de noche sösantle tli quechibelisque giente. <sup>25</sup> Ma quemejtete tli moponieroa, pero amo ca chamöhuallestle ipa iyulo. Ejqueu Deus cuale quenyulcuepasque inu giente para ma quematecö lo que tlin melöhuac. <sup>26</sup> Ejqueu tlajtlacheasque, hua momöquex-tisque de inu trömpa cöne inu Diöblo quenpea para ma quechihuacö itlanequeles.

### 3

#### *Quiene yesque giente ipa sölúltimo tunalte*

<sup>1</sup> Nuyejque xecmate que pa sölúltimo tunalte mochi-huas meyac sösantle tli lalebes petzotec. <sup>2</sup> Gientes sa yejua mismo motlasojtlasque. Sa quetiensusque tomi. Mochamöhwasque hua san yejua mosemajtasque. Yesque tiepöpöcaneme. Amo quenneltocasque intötajua. Amo quetlasojcömatesque. Amo tlaneltocasque

nion lo que tli tlöltecactlōca quejetoa que yaja yectec. <sup>3</sup> Amo quepeasque tlasojtelestle nimpor tlöocoltelestle ca nionōque. Yesque istlacateneme. Abele moaguantōrusque de lo que tli queneque quechihuasque. San petzoteque yesque. Quetlajyelejtasque lo que tlin cuale. <sup>4</sup> Sa tlanōhualasesque. Sa quechihuasque sōsantle sin que amo cachto quepensōrusque. Tientasque de chamōbelestle. Sa quenequesque mopöctisque. Amo quenequesque yesque ca Deus. <sup>5</sup> Niesesque quieme creyentes, cache pa innemeles nieses que toreligiōn amo quenpatlac, ipampa seme tlajtlacojtecate.

Xomoxelo de ini nōncate giente. <sup>6</sup> Pos seque de inu niecate tieinchajchōcajalaque hua quencajcayōhua sohuame tli amo checōjtecate de inneltoqueles, tli quemate ipa inyulo que otlajtlacojque, hua tli quejelibea meyac sōsantle. <sup>7</sup> Seme queneque quetzecusque ocseque sōsantle, pero ayec casojcōmate tlin melōhuac. <sup>8</sup> Ejqueu quieme inu chichichte Janes hua Jambres moponierojque ca Moisés, ejqueu nuyejque inu giente moponieroa ca tlin melōhuac. Inu tlōca quepejpea inpensamientos necuelteque, hua Deus quencuntenōruro ipampa amo melōhuac moneltoca. <sup>9</sup> Pero abele tlacajcayōhuasque lalebes, ipampa noche giente momacasque cuienta de que cate tunfojte, ejqueu quieme opasōre ca inu unte chichichte.

*Seme xeyeta ca lo que tli otectzeco*

<sup>10</sup> Pero taja cuale tectocac lo que tli naja necmate hua necchihua hua necneque. Taja tomoneltocac quieme naja, hua ejqueu quiename naja necxicoa meyac sōsantle, hua nequentlasojtla giente, ejqueu nuyejque taja. <sup>11</sup> Tecmate quiene niechtepotztocaque giente, hua tecmate quiejquech sōsantle onecsufriro. Tecmate lo que tli oniechpasōro ipa inu puieblos de Antioquía, Iconio, hua

Listra. Tecmate quiene giente de ompa niechtepotztocaque, pero Tlöcatzintle oniechmöquextejque de noche inu söstantle. <sup>12</sup> Pos melöhuac, innochie tli quenequesque nemesque cuale tieca Cristo Jesús quesufriusque ipampa giente quentepotztocasque. <sup>13</sup> Pero amo cualteque hua tlacajcayöhuane me mochihuasque cache hua cache amo cuale. Tlacajcayöhuasque yejua, hua yejua mismos mocajcayöhuasque.

<sup>14</sup> Pero taja seme xeyeta ca lo que tli otectzeco, lo que tli taja tomomacac cuenta que yaja melöhuac. Tecmate öquenu metzmachte, <sup>15</sup> hua tecmate que desde cuöc tetzitzequetzi teyeya ye tequixomate tieömahua Deus. Pos yejua ömame cuale metzmachtisque para tomomöquextis por tomoneltocas tieca Cristo Jesús. <sup>16</sup> Deus mismo oquechijque ma quejcuelucö noche lo que tli tlajcuelulpanca ipa teotlajtule. Hua noche inu tli tlajcuelulpanca ica cuale para tiechmachtis, para tiechelfis cuöc amo cuale tenejneme, para tiechyejyectlölis de tonemeles hua topensamiento, hua para tiechbepöhuas para teyesque teyecteque. <sup>17</sup> Ejqueu öque ica tlöcatl de Deus cuale iyes intiero preparödo hua ejqueu cuale quechihuas de noche söstantle tlin cuale.

#### 4

<sup>1</sup> Tieixpa Deus hua tieixpa Cristo Jesús, öque yejuatzi tlajuscörusque tli neme hua tli omejmejqe, temetzencargörfealalebes, siendo que Cristo hualiloas para tlamandörurus, xetlanunutza de tietlajtultzi Deus. <sup>2</sup> Xomodedicöro ca inu cuöc onca locör hua nuyejqe cuöc amo onca locör. Xequenyulcuepa giente, xequemelfe cuöc amo cuale neme, hua xequentlajtulmaca. Ayec xecualöne ca yejua, pero seme xecsequiro xequenmachtejta. <sup>3</sup> Porque huölösque tunalte cuöc giente amo quexicusque inu machestelestle

tlin melöhuac, cache quensentlölisque tlöca tli sa quenmachtisque lo que tli yejua quenejneque quecaquesque. <sup>4</sup> Hua amo quecaquesque tlin melöhuac, tlöcamo quecaquesque sa cuientos. <sup>5</sup> Pero taja seme xecyecpensörojta. Xecsufriro sösantle tli checöhuac. Xetlanunutza inu cuale tlamachestelestle. Xejcumpliro cuale ca motraböjo.

<sup>6</sup> Pues naja necaca quieme sente bentlölele tli ye ica ipa ajtöl; ye necaca para nemeques. <sup>7</sup> Necaca quieme nesoltöro que ye onopeleöro cuale, quieme nedeportista que ye necsencö cuale nocarrera, pues ayec onoxelo de lo que tli toneltoca. <sup>8</sup> Öxö niechchixteca ompa elfecac sente premio de yectelestle, tli niechmacasque ipa inun tunale toTlöcatzintle, öque seme tlayecjuscörruro. Hua amo sa naja niechmacasque, tlöcamo nuyejque quenmacasque innoctie tli quedeseöroa lalebes ma hualiloa yejuatzi.

### *Noticias de iamigos de Timoteo*

<sup>9</sup> Xemöpröro para nima tehuölös teniechejtaqui. <sup>10</sup> Pos Demas ye oniechcajcö ipampa cache quetlasojtlac sösantle de nönca tlöltecpactle. Ye uya ipa Tesalónica. Crescente unya ipa tlöle de Galacia, hua Tito uya ipa tlöle de Dalmacia. <sup>11</sup> Solamente Lucas ica ca naja. Xectiemo Mörcos, ma huöla ca taja, porque cuale niechpaliebis ipa tequetl. <sup>12</sup> Tíquico onectitla ma beya pa Efeso. <sup>13</sup> Cuöc tehuölös xecualeca nosaröpe tli onejcöjtie ompa Troas ca tozni Carpo. Nuyejque xecualeca noömahua, especialmente noömahua de cuetlaxtle.

<sup>14</sup> Inu herriero Alejandro oniechchibele meyac sösantle amo cuale. ToTlöcatzintle quecuepelisque quieme yaja oquechi. <sup>15</sup> Taja xemixute de yaja porque lalebes moponieroa encuntra de tomensöje.



<sup>16</sup> Cuöc cachtö onodefendiero inmixtla tlajtoönejme, nionöque oniechpaliebe. Innochtie oniechcöjque. Deus majcama quencastecörucö por inu. <sup>17</sup> Pero mös yejua oniechcöjque, pero Tlöcatzintle oniechpaliebejque hua oniechchecöjque. Ejqueu cuale onetlanunutz de inu mensöje de nemöquextelestle para que oquecajque giente de nöche tlöltecpactle. Hua yejuatzi oniechmöquextejque de inu bieye peligro. <sup>18</sup> Hua yejuatzi Tlöcatzintle oc niechmöquextisque de noche tli amo cuale, hua niechmalfisique para que neyes ompa elfecac cöne tlamandöruro. Yejuatzi ma quepeacö yectieniebelestle nochepa. Amén. Ma ejqueu iye.

### *Tlajpalulestle*

<sup>19</sup> Xequentlajpalo Prisca hua Aquila, hua ifamilia de Onesíforo. <sup>20</sup> Erasto omocö ompa Corinto, hua Trófimo onejcö ompa Mileto ipampa mococoöya. <sup>21</sup> Xomoöpröro xehuöla antes de cuöc siehuas. Metztlajtlajpaloa Eubulo, Pudente, Lino, Claudia, hua noche ocseque tocnihua. <sup>22</sup> Tlöcatzintle ma iloa ca taja ipa moyulo. Hua ma nemiechmacacö Deus tiefavur.

**El Nuevo Testamento en nahuatl de Tetelcingo**  
New Testament in Nahuatl, Tetelcingo (MX:nhg:Nahuatl, Tetelcingo)  
copyright © 1980 Wycliffe Bible Translators, Inc.

Language: Nahuatl, Tetelcingo

Translation by: Wycliffe Bible Translators, Inc.

Náhuatl, Tetelcingo [nhg], Mexico

### Copyright Information

© 1980, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Nahuatl, Tetelcingo

### © 1980, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Updates

eBible.org

---

PDF generated using Haiola and XeLaTeX on 17 Nov 2018 from source files dated 2 Sep 2018

03771ce6-e402-5a23-8b38-f25c82864faf